

Inatsisartut suleriaasianni § 37, imm. 1 naapertorlugu, matumuuna Naalakkersuisunut imaattunik apeqquteqarpunga:

Naalakkersuisunut apeqqutit:

1. KNI-mut kiffartuussinissamut isumaqatigiissutip malinneqarnissaa kiisalu innuttaasut Kullorsuarmi inoqarfinni allanilu ulluinnarni tunngaviusumik atugassarititaasunik toqqissisimasumik atugaqarnissaat pillugu Naalakkersuisut immikkut qanoq iliuuseqarniarpat?
2. Naalakkersuisut annertunerusumik nioqqutissanik imaluunniit allanik nioqqutissiormik aqqiissutissanik (assersuutigalugu saniatigut allamik umiarsuarnik saaffiginnissuteqartarmik imaluunniit timmisartukkut assartuormik) qulakkeerinninnissamut suliniuteqassappat? Pingaartumik piffissami sila pissutigalugu ajornartooruteqarnermi.
3. Naalakkersuisut piniarnermi atortussat allallu piniartut aalisartullu inuussutissarsiutaannut pisariaqarlunnartut pissarsiarineqarsinnaanissaat qulakkeerniarlugu qanoq iliorpat?
4. Naalakkersuisut nassuiaateqarsinnaappat KNI-mi nakkutilliineq qanoq ingerlanneqartarnersoq aammalu tunisassiarpassuit ukiup ataatsip tungaanut tuniniarneqartarnerat qanoq kinguneqarsimanersoq?

(Inatsisartunut ilaasortaq Jens NapātôK', Naleraq)

Tunngavilersuutit:

Kullorsuarmi Upernaviullu eqqaani inoqarfinnilu allani arlalinni Kalaallit Nunaata sinnerani ukiuni arlaqalersuni annertuumik ingerlaavartumillu nioqqutissanik ajornartorsiuteqartoqarpoq. Pingaartumik Pilersuisumi. Ulluinnarni nioqqutissat tunngaviusut soorlu; qajuusat, sukkut, immuk margarinalu kingunipiluuteqarmata. Pissutsit 2025-imi aasaanerani ajornakusoorsimapput, tamatumalu saniatigut piniarnermut aalisarnermilu atortunik piffissami sivisuumi amigaateqartoqarpoq, tamannalu innuttaasut aqqutigalugit piniarsinnaanerannut aalisarsinnaanerannullu sunniuteqarpoq. KNI-p aamma Naalakkersuisut akornanni kiffartuussinermut isumaqatigiissuteqartoqaraluartoq, arlaleriarluni pisiniarfinni atortunik imaqaanngitsunik



pisoqartarpoq aammalu isumaqatigiissut tigussaasumik malinneqarneranik takussutissartaqanngilaq.

Sumiiffinni inuit misigisarpaat nioqqutissat ikippallaarmata aammalu pisariaqartitsinernut naleqqiullugit qaqutigoortuusut, kiisalu nioqqutissat allat pissarsiarineqarsinnaanngitsut.

Apeqqutigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermi paatsuungasoqassatillugu kalaallisut allassimasoq aallaavigineqassaaq.